

Pol Uqa Jaqec Je Oso

Efesas Tamanec Jaqiaden

Aqunec Je

Pol uqa jaqec je i jaqen saenna uqa Rom ono uqana jona gihacdoc bilen. (Eu Aposel 28.16-31 feiga.) Jaqec je i uqana gug eu odi. Anut uqa ceteteh cunug ifanen eu saona gunnadec mahanaadecca eu Kraisca gabanadeceb Krais uqa cunugnu ilo biligiannu gale dona. (Eu 1.10 feiga.) Odimei Anut uqa uqana dana cajaca age wele agena silailna cal mec biloloig eu age qila Kraisca gabanadeceb cebac bilegina eunu cisdoqagannu gale dona. (Eu 2.4-6 feiga.) Odimei Kristen cunug age wawaga osol biluqagannu gale dona. (Eu 2.19-22 feiga.)

Jaqec je ina dac 1na Pol uqa Anutna eeladec uum adec eunu je mati jaqena. Eeladec uum adec eu odi. Anut uqa Juda dana qeeca, Juda danaca gami nesili ehadeceb age cunug Kraisnu wawaga meleceeb gabandumeig sihunegul osol bilegina. Eu Jisasnab cabi. Anut uqa Kraisna cal mecna uqana dana cajaca ceseli fajaden. Odimei uqa Kis Gun aden. Kis Gun eu ceteh me bahic Anut uqa uqana dana cajaca adigiannu mugumuga mec je maden eu cunug oqagannu gihin adec. (Eu 1.14 feiga.) Dac 2na Pol uqa Kristen cunug age Kraisca gabandu bilegina, eunu age wawaga osol bilimeig Anutna kobil cunug toodoo odoqagannu jaqena.

Jaqec ina Pol uqa Kristen dana cajaca age Kraisca gabanadec bilegina eunuca, age sihunegul osol bilegina eunuca camasac ihacadecnu galolo je mati madena. Uqa Anutna dana cajaca age deweg osol bilegina, odocob Krais uqa deweg eu uqana ilo eunu galolo je oso madena. (Eu 4.1-16 feiga.) Odimei uqa Anutna dana cajaca age jo osol bilegina, odocob Krais uqa jo eu uqana nah man nohinoh eunu galolo je oso madena. (Eu 2.19-22 feiga.) Odimei uqa Anutna dana cajaca age aideg oso, odocob Krais uqa aideg eu uqana gemug eunu galolo je oso madena. (Eu 5.22-32 feiga.) Jaqec je ina ege ceteteh me bahic Anut uqa uqana dana cajaca odadecnu gale dona eu fi cuhadoqona.

Je Dunuhnu Dado Mec

1. Feele adec je (1.1-2)
2. Anutna cisdoc: Krais uqa kobolkobolca, uqa ilo bilina (1.3-14)
3. Pol uqa Kristen age Anutna cisdocca, uqana gagadic odocca eunu du cuhadoqagannu inondona (1.15-23)
4. Anut uqana cisdoc toodona eu odi (dac 2-3)

- A. Anut uqa uqana eeladec uum adecna uqana dana cajaca cahahaadena (2.1-10)
 - B. Krais uqa Juda danaca Juda dana qee eundecca uqana na babalecna tanawaden (2.11-18)
 - C. Juda danaca Juda dana qee eundecca age qila sihunegul osol bilegina (2.19-22)
 - D. Anut uqa je jahunec camasac men eu Kraisna tamanecna Juda dana qee eundec ageha Anut huqanehul bilegina (3.1-13)
 - E. Pol Anut uqa uqana gagadic odoc Kristen adeceb age Anutna Kisna wawaga gagadic tawigiannu inondona (3.14-21)
 - 5. Krais tamanec adi wawaga osol biluqagan (4.1-6.20)
 - A. Age Kis Gunna cisdoc osol biluqagan (4.1-6)
 - B. Age dana cajaca wasimeig Kraiswe caloqagan (4.7-16)
 - C. Kristen age agena cisdochca, wawaga madecca waticduadeceb haun ibuldugian (4.17-5.20)
 - D. Age cotogail agena je toodocobtoodocoboigale (5.21-6.9)
 - 1. Krais binan sulecnu age cotogail agena je toodocobtoodocoboigale (5.21)
 - 2. Gemugail aidagailca adi osol biluqagan (5.22-33)
 - 3. Mel simca age anagail memegailca adi osol biluqagan (6.1-4)
 - 4. Begabeg meh cabi danaca cofadec danaca adi osol biluqagan (6.5-9)
 - E. Seten cadecnu age Anutna gagadic odoc umei uqa uenna tatawi gagadic meigale (6.10-20)
 - 6. Cit qoc je: Feele adecca eeladec jeca (6.21-24)
-

1 ¹Ija Pol, ija Krais Jisasna aposel. Anut uqana cisdocna ija Krais Jisasna aposel miten. Ija Anutna dana cajaca qagoc age Efesas bilegina, age Krais Jisasna jic tutuc cobogina eu age je i jaqidigina.
²Memige Anutca Jisas Krais Tibudca alena eelgec uum igecca malol bilecca adesiale.

Anut uqa ege eeldoc cunug Kraisna igen

³Anut ege Kraisca gabangi biluquna eunu eelgen, uqa eeldoc cunug eu saona gunnadec ege dolonige cesuldocnu igen. Eunu ege eguna Tibud Jisas Krais uqa Memeg Anut binan suluqale! ⁴Anut maha qee ifanec ninjen uqa ege uqana bilitoqannu Kraisca gabandoc biley euna wele nesili ehigen. Uqa ege gun bileyenca, cahuldocca qee uqa amegna bileyqannu nesili ehigen. Anut uqa nalunige menanu ⁵uqa casac wele odi cisdon, uqa Jisas Krais umna ibulgeceb ege uqa melahul bileyqannu ec cisdon. Ceteh eu uqana cisdoc gale docca. ⁶Anut uqana eelgec uum igeceu binanca bahic! Uqa Melah uqa nalug mena eu ege uqaca gabandu biluquna eunu Anut eelgec uum igece bagolwe igen. Eunu ege Anut binan suluqale!

⁷Anutna eelgec uum igec eu ben bahic! Krais ege ceseli fajigecnu cal men. Uqa egena silail cagasigecnu uqa golac basecdocob nen. Eunu ege Kraisca gabandu biluqunanu ege besigec biluquna. ⁸Anut uqa uum igec eu geh bahic igen! Anut uqa uqana doc meca, uqana cisdoc silec cunugca eu igen. ⁹Anut uqa ceteh odigiannu Krais cabi ocna odigian ec wele cisdon. Euqa uqana cisdoc eu jahuni bilen. Odimei qila Anut uqa uqana gale doc toodumei uqana cisdoc jahunec eu ihacgeceb dom. ¹⁰Uqana ceteh eu odigiannu cisdon eu odi. Uqa ceteteh cunug ifanen eu dado mumudeb lili saen uqa wele gadac menna uqa ceteteh cunug, eu saona gunnadec mahanaadeca, Kraisca gabandocob Krais uqa cunugnu ilo biligian ec cisdon.

¹¹Anut uqa uqana cisdoc gale docca toodona, eu uqa ceteh oso odocnu cisdonia euha uqa odocob calena. Odimei wele bahic gug qoc saenna uqa uqana gale docna ege Juda uqa ege Kraisca gabandoqannuca, ege uqana dana cajaca bileyqannuca nesili ehigen. ¹²Ege Juda, ege aquniadec Kraisnu wawige meleeceeb toodom eu ege uqa binan fulacdoccia, gagadic odocca sulecnu nesili ehigen.

¹³Ageha age mele je wele dah mein, eu me je euna Anut caahahaaden. Odocob age Kraisnu wawaga meleeceeb Anut age Kraisca gabanaadimei uqana je hahun wele maden eu toodumei Kis Gun aden, Kis Gun eu Anut uqa uqana dana cajaca ceteh me adigian ec maden eu ege oqan uqana sisi mec. ¹⁴Ege ageca Kis Gun wele om. Eunu ege doqona, hibna egeha ceteh me bahic Anut uqa uqana dana cajaca adigiannu mugumuga mec je maden eu cunug oqan. Ege Anut uqa ege caahageceb ceteh me bahic eu umeb ege uqaca besigec bileyqannu sumudi biluquna. Eunu uqa binan suluqale!

Pol uqa Anut Efesas tamanec doc silecca adigiannu inondon

¹⁵Ageha me je dah mimeig Kraisnu wawaga meleeceeb Kis Gun oin gug inu ija agenu inondugina. Odocob ija age Jisas Tibudnu wawaga meleecca age Anutna dana cajaca qagoc cunugnu nalunuga mecca ec dah mem. ¹⁶Eunu ija agenu Anut gaid hetaga dugina. Ija ijana inondocna agenu gaid cisdugina. ¹⁷Ija agenu Jisas Krais egena Tibudna Anut, uqa Memige fulacdoccia benca gagadic odocca, odi inondugina. Anut uqa doc silecca cisdoc fogo adecca adeiale, odocob age uqanu du cuhadoqagannu ec inondugina. ¹⁸Ija Anut agena cisdoc fogo duadeceb eu age fulacdoccia foqagannu gale tena. Eunu age uqana dana cajaca bileygina eu age cel ceteh me age ocnu utaaden eunu sumudi bileygina ec doqagan. Odocob age Anutna dana cajaca qagu bileygina eu cehewanaga me bahic hibna adigian ec mugumuga mec je maden eunu doqagan. ¹⁹Odocob ege Anutnu wawige meleena uqana gagadic odoc euna cesulgena eu gagadic bahic ec doqagan. Anutna gagadic odoc ege sanijecnu ihoc qee. Uqa

uqana cabi eu ege uqana gagadic odocna oqona. ²⁰Anut uqa uqana gagadic odoc euna wele uqana cabi eu Kraisna u hedon. Uqa Krais cal mecnadec tulidumei saona gunna ehudi ti uqa eben meulana isec mudeceb bilen saen euna uqa uqana cabi u hedon. ²¹Odocob Krais uqa ohis bahic bilia. Uqa king bilec cunugca, ilo bilec cunugca, gagadic odoc cunugca, cofadec cunugca eu saona mahanaca bilegina wooladec ohis bilia. Odocob uqa dana qila saen ina ijanagaca bilegina isi saen hibna ijanagaca biluqagan eu cunug wooladec bilia. ²²Anut uqa ceteteh cunug Krais jaih bisalu men. Odimei uqa tamanec cunugnu ceteteh cunug agena ilo bahic biligliannu muden. ²³Tamanec eu Krais deweg. Krais uqa ceteteh cunug am beceb asaneginawe eu odi tamanec eu Krais am beceb asanen.

**Ege dana cajaca cal mec bilolob eu Anut uqa ege
Kraisca gabangeceb cebac biluquna**

2 ¹Wele age silailca kobil cahuldocca eu odoloig, odocob eu aqeceb cal mec biloloig. ²Saen euna age maha uqana qisol mec kobolna coboloig. Age buga me qee saona bilegina eu agena ilo toodoloig. Kis me qee gagadicca eu uqa dana cajaca age Anutna je tefacdoggina eu wawaga dunuh cabi ona. ³Eu mele, ege cunug wele dana cajaca eundec gemo bilolob, odocob ege dewenigena gale gec me qee eu toodolob. Ege dewenigenaca eguna cisdochnaca gale gec me qee eu toodu odolob. Eunu ege Anut ameg me qee wadacgec ocnu ihoc bilolob. Ameg me qee wadacadec eu Anut saciadon nijia, uqa dana cajaca cunug uqana je tefacdoggina eu wadacadigiannu nijia.

⁴Euqa Anutna waug qoc eu am bec bahic, odimei uqa egenu nalunige mec eu ben bahic. ⁵Ege eguna silailna cal mec bibiluqun uqa oigimei Kraisca gabangeceb cebac biluquna. Anut uqa uqana eelgec uum igecka cahahaaden. ⁶Odocob uqa ege Krais Jisasca gabangi uqaca tuligimei ehigi ti uqaca saona gun ohis migeceb ege uqaca king biluquna. ⁷Uqa eetanu odi odon? Uqa ege Jisas Kraisca gabangec biluquna eu uqana eelgec uum igecca uqa egenu nalunige mecca eu me bahic cunug amagana hibna saen cunugna ihacadigiannu odi odon. ⁸Ge, Anut uqa uqana eelgec uum igecka age wawaga meleceb cahahaaden. Odocob eu agena odocna qee, eu Anutna bagol igece himec. ⁹Eu dana agena odocna qee, eunu dana oso uqa culai madi, Anut uqa ijana odocnu cahahaten, odi cain madeiaun. ¹⁰Ge, Anut uquadodoc ege migen. Uqa ege Krais Jisasca gabangec cabi me oqannu migen. Anut uqa wele cabi me oc eu ege jic euna cobeqannu saciadon.

**Krais uqa Juda danaca Juda dana qee eundecca
sihul lecis gabanaleceb ale osol mesin**

¹¹Age cisdoiga, Juda dana age dewenega cagu qoc kobil odogina eu Efesas age dewenega cagu qee qoc egina. Je madegina eu kobil eu dana

age himec dewenegana odogina. Eunu age wele adi biloloignu cisdoiga.

¹² Age saen euna Krais qisacdoc bilein. Age Isrel sihulha qisacdoc bilein. Anut uqa uqana bal cehec je mamadien euna uqana je hahun qee dah melein. Age maha ina Anutca qee bielein, odocob age Anut uqa cahahaadecnu qee susumudi bielein. ¹³ Wele age Anut qisacdoc bahic bilein. Euqa qila Krais uqa agena silail cagasiadecnu uqa golac basecdocob nen. Eunu Anut age Krais Jisasca gabanaadimei ehadeceb age Anut cemenug bahic bilegina. ¹⁴ Ge, Krais uqa malol biley egeca ahon. Wele Juda danaca Juda dana qee eundecca sihul lecis ale cadolosi. Cadec eu hih cehec benwe gemona tawoloi. Euqa Krais uqadodoc dewegna hih cehec ben eu wagalimei Juda danaca Juda dana qee eundecca gabanaleceb sihul osol qila bilia. ¹⁵ Uqa Mosesna loo jeca Juda agena loo je cunugca cacu qelen. Uqa sihul lecis eu gabanaleceb alena cudunna uqadodoc dewegna dana haun oso ifanigiannu odi odon. Eunu uqa malol biley muden. ¹⁶ Uqa na babalecna cal mennu sihul lecis eu Anutnu tanawaleceb ege deweg osol bileyqannu odon. Eunu uqa na babalecna cad mudeceb mudeceb kobol eu qocob cal migiannu odon. ¹⁷ Odocob Krais humei uqa malol biley cu me je qasali maden. Uqa Juda dana qee eundec age qisacdu bahic bilein eu qasali maaden. Uqa Juda dana cemenug bilein euha qasali maaden. ¹⁸ Ge, ege sihul lecis Kraisnu Kis osolna Memige Anut cemenug hocnu ihoc oqona.

Ege Kristen cunug Anutna jo bahic

¹⁹ Eunu qila age jag dana cajaca age mahaca qee bileyinawe qee bileyina. Age Anutna dana cajaca qagoc sihul osol. Age qila Anutna tal bileyina. ²⁰ Age Anut jo cehenwe odi. Uqa ege aposelca je hahun madec danaca jo i uqana nah cehen. Odocob Krais Jisas uqadodoc uqa jo i uqana nah man nohinoh bahic! ²¹ Uqa dih uqa jo eu uqana teful cunug hewena, odocob jo eu cuha jo ben caligian odona, eu Tibudnu cuha jo ben gun bilina. ²² Ageha age Kraisca gabanaadec bileyina, odocob Anut uqa age uqana dana cajaca leih gami osoben gabanaadena, eu age Anutna jo bahic taweginia, jo euna Anutna Kis biligiannu.

Pol uqa Juda dana qee eundec me je qasali maadecnu cabica

3 ¹ Anut uqa Juda danaca Juda dana qee eundecca tanawadi gabanaadec ege Krais deweg osol biluquna gug inu ija agenu inondugina. Ija, Pol, ija Krais Jisasna cabi dana, ija age Juda dana qee eundec cesuladecnu cabi ugina eunu gihacdoc jona biligina. ² Anut uqa eeltec uum itimei uqa cesuladecnu cabi i ugennu iten ec dah mein eu mele cisdugina. ³ Je i Anut uqa ceteh i odigiannu eu wele jahunec bilen eu Anut uqa ija mateceb dom. Eunuwe ija je eu wele nag odi jaqiadiga. ⁴ Odocob age je i ija jaqiadiga eu sanijuqagan saen euna age ija cabi i

Krais odonnu je jahunec eu du cuhadugina ec doqagan. ⁵Wele bahic Anut uqa dana cajaca je jahunec i oso qee camasac mudi maadel. Qilaqa uqa uqana aposel gunca je hahun madec danaca je jahunec i Kisna camasac mudi maaden. ⁶Je jahunecna gug eu odi. Age Juda dana qee eundecnu me je eu age egeca sihul osol, dewenige osol, odi calom. Odocob ege cunug ege Krais Jisasca gabangec ege uqana mugumige nec Anut uqa eunu je hahun maden eu oqan. ⁷Anut uqa eeltec uum iteceb ija me je qasali maadecnu cabi dana calem. Uqa uqana eelgec uum igecca uqana gagadic odocca ija cabi i ugennu gagadic mitecnu iten. ⁸Ijaqa ija Anutna dana cajaca qagoc cunug agena bisalu biligina. Euqa Anut ijanu waug qocob uqa Juda dana qee eundec me je qasali maadecnu cabi i ija ebenina men. Me je i eu Kraisna ceteteh me bahicnu madena, me je eu cehewanca bahic, ege dana cajaca sanijecnu ihoc qee. ⁹Anut uqa ceteteh cunug ifanen. Uqa ceteh cunug odigiannu casac uqana cisdoc jahunen. Uqana cisdoc eu wele saensaen cunugna jahunec bilen. Qilaqa Anut uqa uqana cisdoc jahunec adi caligian eu dana cajaca cunug qasali maadecemin foqagannu cabi i iten. ¹⁰Wele Anut uqa ceteh oso jahunen, euqa qila uqa uqana tamanecna uqana cisdoc sileCCA filfil bahic eu camasac muden, king bileCCA ilo gagadic odocca age sao ohisna bileyina eu age doqagannu. ¹¹Wele bahic Anut uqa ceteh oso qee ifanel saen eunadec ceteh i cunug odigiannu cisdon. Odimei qila uqa Krais Jisas, egena Tibud, uqana cabina odocob ceteh i camasac men. ¹²Odocob ege Krais Jisasnu wawige meleeceb uqaca gabangec biluquuna. Eunu ege Anut cemenug lecnu ihoc eu du cuhadoqona, ege odi odocnu qee cucuiuquuna. ¹³Eunu ija niniadigma, ija agenu sogoigina eunu cain dumanaga culiaun. Ija cesuladigma eunu age binanagaca bileyina.

Pol uqa Efesas tamanec gagadic tawigiannu Anut inondon

¹⁴Anut uqa Juda danaca Juda dana qee eundecca tanawadi gabanaadeceb ege Krais Jisasnu wawige meleeceb ege uqaca gabangec Anut cemenug lecnu ihoc oqona gug inu ija Memige Anut amegna gob cehimig inondugina. ¹⁵Uqa sihul cunug age saona mahanaca bileyina eu age Memega. Odocob uqa sihul cunug age ijanaq aqen. ¹⁶Ija gob cehimig Anut odi inondugina, uqana kobolkobol cehewanca bahic eunadec gagadic odoc adeceb age Anutna Kisna wawaga gagadic tawigiannu inondugina. ¹⁷Odocob age Kraisnu wawaga meleecna Krais uqa age wawaga dunuh biligiannu inondugina. Odocob agena dana cajaca cunugnu nalunuga nec eu age wawagana wasimei duuec tawigiannu inondugina, eu odiwe na bebeig eu maha gagadic heweceb na duuec tawena. ¹⁸Eunu age Anutna dana cajaca qagoc osoben cunug age Kraisna nalug nec eu docnu gagadic odocca ihoc. Kraisna nalug nec eu bagalan ben bahic, eu cecelac ben bahic, eu ohis tec bahic, eu mahana dunuh noc

bahic.¹⁹ Odocob age Kraisna nalug mec eu du cuhadoqagan, euqa dana egena cisdockunug eu wooldoc. Odocob Anutna duman me bahic cunug eu Anut uquadocnu am bec eu agenuha am bigian.

²⁰ Aria, Anutna gagadic odoc eu ege wawige cabi ona eu egena cisdockuwooldocnu ihoc odona. Anutna gagadic odoc eu ege Anut odocnu cisdooqona, ege Anut odocnu inondoqona eu cunug wooladecnu cabi ona. ²¹ Ege Anutna tamanec dana cajaca cunug saen qila hibechagaaid Anut Krais Jisasca binanala sulocomun cataneiale! Mele.

Ege Kristen ege Krais deweg

4 ¹Ija Tibudna cabi dana, ija gihacdoc jona biligina. Age Anut toodumeig tutuc cobocnu utaaden. Eunu Anut uqa agenu ceteh cunug Kraisna odonnu ija age tuliadecemin coboc i toodu cobocnu niniadigina. ²Age jogoi cobocca, gemanaga jocosaigca, lalafanagaca odi coboigale. Age cotoga oso uqa me qee odadceebfi age ameg me qee cain wadacdowain. Age nalug mecebmecebeigale. ³Kis uqa ege wawige osolna bileyku kobil igma, odocob kobil i ege haluna cinigwe libicebil ege sihul osolna malol biluquna. Eunu age kobil i hewecnu gagadic meigale. ⁴Ege dewenige osolca Kis osolca eu bilia. Eu odiwe age ceteh osol dih ocnu sumudi bileyka eunu Anut utaaden. ⁵Eu Tibud osol bilia, eu wawige meleec osol nijia, eu wa joigec osol nijia, ⁶eu Anut osol bilia. Uqa ege dana cajaca cunug Memige, uqa dana cajaca cunug agena ilo bilia, uqa dana cajaca cunug gemo cabi ona, uqa dana cajaca cunug dunuh bilina.

⁷Krais uqa ege eelgec uum igec oso abesabes siwigen. Eu odiwe Anut uqana eelgec uum igec ege abesabes siwigen. ⁸Anutna jaqec je odi madena:

“Uqa ohis bahic ten eu uqa gihacdoc dana mati bahic cedadeceb osobenca tein.

Odocob uqa dana cajaca bagol adec eu aden,” ena.

(Buk Song 68.18)

⁹Aria, je i “Uqa ohis bahic ten,” eu cel gugnu? Uqana gug eu uqa casac maha dunuh bahic toni non. ¹⁰Eunu uqa toni non eu uqa saona gun ohis bahic ten. Uqa uquadoceteh cunug am bigiannu odi odon. ¹¹Odocob uqana bagol igec eu odi. Dana leih age aposel cabi aden, odocob leih age je hahun madec cabi aden, odocob leih age me je qasali maadec cabi aden, odocob leih age tamanec cofadec cabi aden, odocob leih age me je iwaladec cabi aden. ¹²Uqa Anutna dana cajaca qagoc age Anutna cabi ocnu saciaadugia bili eu odi odon. Odocob uqa tamanec, eu Krais deweg, ceheceb gagadic tawigiannu odi odon. ¹³Uqa odiodi oodon li ege cunug wawige osol gabandu bileyqannu, odocob egena wawige meleec eu osol migiannu, odocob ege Anut Melahnu du cuhadoqannu, odocob

ege dana ben meqannu eu odi Krais uqa dana ben menwe. ¹⁴Eunu ege mel sim cinigwe haun qee biluqaun, odocob je i faninadec dana age iwaladegina eu ege macas qahimei wagna cinigwe cain cecelgi lili huhu eiaun. Faninadec dana agena iwaladec je eu uhulec, eu dana agena cisdoc himec. Eu fufu cinigwe ege fulugeceb filfil ilag cain coboqaun. ¹⁵Euqa ege nalug mecca mele je eu maadoqale. Odocob ege dana cajaca wasimeb Kraiswe caleqan, uqa egena ilo. ¹⁶Uqa uqana deweg cunug cofdona. Uqa deweg amihilon filfil tubadi sogeceb gagadic tawena. Krais uqa amihilon filfil eu meceb deweg gagadic hehdona. Odocob amihilon filfil cunug eu agena cabi me oogin deweg me bahic ben mena, odocob deweg eu uquadodoc nalug mecna ben mena.

Ege wawige meleec dana cajaca Kraisna cebac bilec haunna coboqale

¹⁷⁻¹⁸Aria, ija Tibud ijanna je i ulauladigina, age haiden dana agena kobolna cain cobowain. Haiden age wawaga eu tahac qon. Eunu agena cisdoc eu ceteh gauc, agena cisdoc eu tuca. Eunu age Anutnu docca qee bilegina, odocob age Anut cebac bilec igin auna qee bilegina. ¹⁹Age kobol me qee odoginanu majanaga qee adena. Age wal kobol majanagaca qee odocnu gale adena, age kobol me qee filfil gegehinca odocnu wawaga cajena.

²⁰Eu Kraisna iwaladec qee! Efesas age kobol i Kraisnadec qee oloin!
²¹Eu mele bahic cisdugina, age Kraisnu dah mein, odocob age uqana dana cajawe bilecnu mele je Jisasna nijina euna iwaladein. ²²Wele ageha deweg hilah uquadodoc golac me qeenu sililec eu toodu odoloig, eu agenel quaaadi me qee bahic moloi. Euqa qila age deweg hilah uqana kobol eu huli heleiga. ²³Age Anut culdeceb agena cisdocca, wawaga madecca waticduadeceb haun ibuldugian. ²⁴Age Anut deweg haun taceigale, eu Anut uquadodoc hahun qu muden nijia, eu ititomca, eu gunca, eu mele bahic.

²⁵Eunu age uhulec je cuculeig wawige meleec cotigcotigca mele je madeigale. Ge, ege deweg osol uqana nahanaha biluquna.

²⁶"Age gemanaga bebeb cain silail mowain," en.

(Buk Song 4.4)

Age gemanaga bebeb cam qee caji lec ninijeb gemanaga bodoeiale.

²⁷Gemanaga bec eu Setenna bilec cudun cain mudecebil nijiaun. ²⁸Oso heje on eu haun cain heje oiaun. Euqa oso ihocca qee eu loo utecnu uqa gagadic mimi uquadodoc ebenna cabi ocob ceteh me cali hoiale.

²⁹Socaec je conoganadec cain cali hoiaun. Ceteh oso cogogec nijecebfi tutuc migiannu je himec madeigale. Je eu eeladec oqagannu age dah mecebil cesuladigian. ³⁰Kis Gun eu age Anutna dana cajaca bilegina uqana gaga, eu Anut uqana besiadec deelnu qagu madec bilegina uqana sisi mec. Eunu ageha Anutna Kis Gun waug me qee mudecebil cain waloc

doiaun. ³¹ Age je me qee gulihinca, olohon becca, gemanaga becca, eu cunug qisacdu hibemdoigale. Age dana cajaca cain galac madowain, cain socaadowain, cain sagagadowain. ³² Age cotigcotignu wawaga nelugca, culunuga occa odudecebodudecebeigale. Anut age Kraisca gabanadec agena silail dahig celenwe eu odi age cotigcotigna silailha dahig celeceb elecebeigale.

Ege Tibudna fulacdocna biluqale

5 ¹ Age Anutna mel sim uqa nalunuga mena, eunu age Anutna kobil toodu odimeig Anut cicilon oigale. ² Age wawaga meleec cotogailnu nalunuga mecna coboigale. Eu odiwe Krais uqa egenu nalunige mimei uquadodoc cebac biley culimei Anutnu ihandon. Ihandoc eu dedeman me bahic wasena.

³ Age wal kobilka, kobil me qee gegehinca, osona ceteh ocnu gale adecca eu cain odowain. Age Anutna dana cajaca qagoc eunu oso age kobil eundec odocnu je cain madeiaun. ⁴ Age Anutna dana cajaca ititomnu age je gegehinca, udoc je me qeeca, lelandoc jeca eu cain madowain. Euqa age Anut hegaga ec himec madeigale. ⁵ Oso uqa wal kobilka, uqa kobil me qee gegehinca, uqa osona ceteh ocnu gale docca eu Kraisna culca Anut mugumige mecca naha oso qee oiaun, eu mele bahic. Dana eu uqa osona ceteh ocnu gale dona eu uqa kadan tibudnu cuha fenawe.

⁶ Silail kobil inu dih Anutna gemag bec eu dana age uqana loo je tefacdolina eu ageca hona. Eunu age dana oso cain culdecebile je gaucna quauadeiaun. ⁷ Odimeig age dana eundec age gami cain ihol mowain. ⁸ O Efesas, age wele tucana biloloig, qilaqa age Tibud uqa uqana fulacdocna madeceb euna bileyina. Eunu age dana cajaca fulacdoccana bileyinawе coboigale. ⁹ Ge, ceteh eu me bahic, ceteh eu ititom, ceteh eu mele bahic eundec cunug eu fulacdoc uqana aig qoc. ¹⁰ Age Tibud uqa kobil adec gale dona eu docnu cabi oiga. ¹¹ Dana tucana kobil odogina eu ageca cain ihol mowain. Kobil tuca i edec uqana aig qoc eu gauc himec. Euqa age kobil tuca i dana cajaca cunug ihacadebil camasac meia. ¹² Ge, dana kobil i jahuncna odogina eunu ege je madecnu majanigeca. ¹³ Euqa age ceteteh cedadimeig fulacdocna madecebile uqana gug camasac caleceb dana cajaca cunug age fecnu ihoc. ¹⁴ Odocob ceteteh cunug camasac mena eu fulacdoc ibuldona. Eunu leih age je i madegina:

“O dana us nijigina, hina camali cajaga!

Hina cal mecnadec cajecem

Krais uqa fulacdoc ihigian,” egina.

¹⁵ Age agena cobocnu meci cuhadoiga. Age dana cisdoc silecca qee cinigwe cain cobowain. Age dana cisdoc silecca cinigwe coboigale. ¹⁶ Age Anutna kobil odocnu cabi oiga, ge saen qila eu me qee. ¹⁷ Eunu age cain gad mowain qa Tibud uqa age adi odocnu gale dona eu wali feiga.

¹⁸ Ceu jeceb dalul qoc eu kobil me qee, eunu age ceu jeceb il Cain aqeaun. Euqa age Kis culdecebile uqa wawagana am bi ihoc ligiannu odoigale. ¹⁹ Age samnaca, kalamnaca, due Kis Gun iwaladena eunaca je madocobmadocobeigale. Age conogana wawaganaca Tibudnu due sileigale. ²⁰ Age saen cunugnu ceteteh cunugnu egena Tibud Jisas Krais ijanna Anut Memige gaid hegaga doigale.

Pol uqa gemugail aidagailca maaden

²¹ Age Krais binan sulimeig age cotogail agena je toodocobtoodocoboigale.

²²⁻²³ Krais uqa tamanecna ilo bilina. Tamanec eu Krais deweg, odocob Krais uqa ugana caahahaadec. Eunu Krais uqa tamanecna ilo bilinawe eu odi gemug uqa aidegna ilo bilina. Odocob age Tibudna je toodu odoginaweu odi aidagail age gemugail agena je toodu odoigale.

²⁴ Tamanec uqa Kraisna je toodu odonaweu odi aidagail ageha gemugail agena je cunug toodu odoigale.

²⁵ Krais uqa tamanecnu nalug mimei uqa tamanec cesuldocnu ugana cebac biley culenwe eu odi dana age aidagailnu nalunuga meigale. ²⁶ Uqa tamanec Anutna jena wa joudimei soidocob Anutnu qagu biligiannu eu odi odon. ²⁷ Eunu uqa tamanec eu u ahumei uquadodoc amegna me bahic tawigiannu odi odon. Odocob tamanec eu gegehinca qee, gononca qeeca, ceteh eu cinigwe ecca qee eu odi biligiannu odon. Odocob tamanec eu cahuldocca qee, uqa gun biligiannu odon. ²⁸ Eunu dana agedodoc deweneganu nalug meginaweu odi age aidagailnu nalunuga meigale. Dana uqa aidegnu nalug mena eu uquadodocnu nalug mena. ²⁹ Ge, dana oso uquadodoc deweg sagagdona eu odi qee nijel. Euqa Krais uqa tamanec cofdonaweu odi dana uqa deweg sab utimei me cofdona. ³⁰ Ege Krais dewegna amihilon eunu uqa odi odona. ³¹ Anutna jaqec je eu odi madena:

“Gug inu dana uqa memeg anagca culalimei aidegca gabanalecebile biluwasan.

Odocob lecis ale deweg osol biluwasan,” ena.

(Jenesis 2.24)

³² Jahunec gug ben eu Anutna jaqec je ina bilia. Ija cisdugina, ugana gug eu Krais ugana tamanecca ec madena. ³³ Euqa ageha odi odoigale. Dana cunug age agedodocnu nalunuga meginaweu odi age aidagailnu nalunuga meigale. Odocob caja cunug age gemugail agena je toodu feigale.

Pol uqa mel sim anagail memegailcanu maden

6 ¹ Mel sim age anagail memegailca je madecebile toodu odoigale. Age cunug Tibudca gabanadec bilegina eunu kobil tutuc i odoiga. ² Loo je ugana je gagadic oso eu odi madena, “Hina anin memena

je madecebile toodu odogale,” ena. Je gagadic eu je hahun oso tubdoc aquuniadec nijia. ³ Je hahun eu odi tubdu madena:

“Eunu cunug hinanu me biligian,
odocob hina maha ina saen cecelacca bilegan,” ena.

(Loo 5.16)

⁴ Memegail age agena mel sim elalenadecebile gemanaga bigiannu cain odowain. Euqa age cofadi cuhadumeig Tibudna je ihoc mecnaca iwaladeigale.

Pol uqa begabeg meh cabi dana agena cofadec danaca eunu maden

⁵ Begabeg meh cabi dana age agena cofadec dana maha ina bilegina eu age conoga toodu odoigale. Age cucuiiecca, qelelecca, wawaga osolca cabi oiga, eu odiwe age Kraisnu cabi ogina. ⁶ Age cofaadecbil age quauadi amagana himec cabi me ogina eu age cabi me ogina ec madecnu odi cain odowain. Euqa age Kraisna cabi dana eu odi cabi oiga, age Anutna gale doc toodocnu wawaga ceeleiale. ⁷ Age wawaga mena cabi oiga. Age eu dana agena cabi himec cain owain, ge eu age Tibudna cabiha ogina eu odi oiga. ⁸ Age dogina, dana oso uqa me odona, eu begabeg meh cabi danafo, qee cofadec danafo, Tibud uqa dana eundec cunug ameg mena wadacadigian, eu agena me odoc ihocihoc mumudi adigian.

⁹ Odiha age cofadec agena begabeg meh cabi dana mena odadeigale, age cucuiuqagannu kobolna cain odadowain. Age dogina, begabeg meh cabi dana agena Ben, cofadecca agena Ben uqa saona gunna bilina, odocob uqa begabeg meh cabi danaca cofadec danaca cunug gug osolna dih ihocihoc gesiladena.

Kristen age han dana cinigwe

¹⁰ Ija cit qoc je oso maadigen. Age Tibudca gabanadec bilimeig uqana gagadic odocnu cisdoiga. Uqa uenna tatawi gagadic meigale. ¹¹ Age Anutna han cadec bala cunug taceigale. Euna age Seten nawel cocobi wooladecnu hohob age uqana cisdoc me qee euna tiec taweceil ihoc ligiannu. ¹² Ge, ege age dana dewenega golanagaca eundecca qee cadoqona qa ege tibud me qee eundecca, kis ilo gagadic odoc eundecca, maha cofadec age tu saen ina maha cunug cofadegina eundecca, buga me qee mati bahic age sao ohisna isec cobogina eundecca eu age gami cadoqona. ¹³ Eunu age Anutna han cadec bala eu umeig cunug taceigale. Eunu Setenna qisol mec deel hocob age agena mahana tiec tawecnu ihoc. Odocob age han cadi hedumeig tawecnu ihoc.

¹⁴ Gagadic taweiga. Odocob age umunugana mele je oologamca taqeiga. Odimeig age hannu jamel ititomca culunugana jahuldocnu be cawi taweigale. ¹⁵ Age malol bileyecnu me je hewi cobocnu eu jaimaga tacecna taci taweigale. ¹⁶ Age wawaga meleec eu agena gelac cacudocnu heweiga,

eu cain bahic dahiniga celeiaun. Gelac eu qisol mec gug uqana jalaig jaca guseceb hu qocob cunug cafuligiannu ihoc. ¹⁷Age caahahaadec katakat eu age ilomoga jahuldocnu umeig taceigale. Age Kisna han sigin, eu Anutna je, umeig ebenegana heweigale. ¹⁸Age Kis wawaga ihoc leceb je madocnaca ninidocnaca saen gaid inondoigale. Gug inu age meci cuhadoigale. Age cain jaen mudowain. Age gaid Anutna dana cajaca qagoc cesuladecnu inondoigale. ¹⁹Ageha ija me je uqana jahunec gug camasac mecnu madige bili saciadugen euna Anut uqa je iteceb ija me je saluqi u maadigennu ijanu inondoigale. ²⁰Ija me je i saadecnu dana sos, ija gug inu gihacdoc jona senna qagitec biligina. Ija me je saluqi u maadigen eu odi maadoum igina eunu Anut inondoiga.

Cit qoc feele adec je

²¹Tikikas eguna wawige meleec cotige eu ege nalug moqona, uqa Tibudna cabi tutuc ona, uqa ijanu je cunug saadigan. Eunu age ija adi biligina, adi odigina eunu doqagan. ²²Ija gug inu age ege adi biluquna doqagannuca, odocob uqa age wawaga gagadic mudadigiannuca ageca suldochomin lena.

²³Malol bilec ageca biliale. Memige Anutca Jisas Krais Tibudca ale cesuladecebilek age wawaga meleeceb wawige meleec cotigeil nalunuga meigale. ²⁴Cunug age eguna Tibud Jisas Kraisnu nalug mecebilek catanena eu Anutna eelgec uum igec eu ageca biliale.